



*Rabu, 03 Oktober 2023*

**Ogen: Amos 9:1-6**



*La Lit Sada Pe Si Pulah*



**A**di Tuhan enggo merawa ise banci ngolangisa? Labo lit ise pe entah kai pe si banci mpengadi rawaNa. Tuhan si erkuasa, kai pe banci ibahanNa guna nehken rawaNa. I bas pengenehenenna Nabi Amos ngidah Tuhan tedis i deherken batar-batar Rumah Pertoton. IsuruhNa merperken binangun Rumah Pertoton gelah pecah-pecahna ndabuhi takal kalak Israel. E ngatakensa kernepken bangsa e, bunuh kerina sabap lanai lit si mehuli lagu langkahna i lebe-lebe Dibata. Si la kerimate i bas Rumah Pertoton, Tuhan munuhsa i bas perang. La lit sada pe si pulah. Di lit pe usaha bangsa e kiam ku teruh taneh, ku je pe itangkap Tuhan, di cebuni pe ia ku teruh kawit, naga lawit isuruh Tuhan nangkapsa. Adi cebuni pe ia ku datas deleng, ku je pe idarami Tuhan. Kerina iradasken, kerina ikerneppen. La lit si tading. Bage me ban cigana ate Tuhan bangsaNa. Arah perkatan Tuhan e Nabi Amos ngidah maka kuasa Tuhan e la tertandingi. Kerina si lit i bas doni enda i teruh kuasaNa. Deleng-deleng, lawit si mbages ras naga lawit pe tunduk man baNa. Adi ikuitna doni enda jadi me linur si erbahansa kerina jelma eceda ate. Lawit pe nimai kai si isuruhNa. La lit sada pe si nogan adi bekas persuruhanNa. Gelarna pe Tuhan, si mada kerinana ras singaturkensa.

Arah pengeneheneh Nabi Amos e erlajar kita maka Tuhan e la erngena ate ku bas perbahanen si jahat, munafik ras la setia. Nembeh kal ateNa ngenehen bangsa erlua-lua i bas kiniteken. Labo terjeng man bangsa Israel, man banta pe genduari seh nge kata e. IkerneppenNa nge kita adi la setia man baNa. Tuhan e erkuasa, isekhenna nge kai si ibelaskenNa.

Perlu kal sidadhken kesetiaannta man bana teptep wari.